

Il campus da la HTW vegn ad esser a Cuira

Ura da dumondas al cussegl grond

■ (anr/fa) **Pliras deputadas e deputads al cussegl grond han fatg adiever da l'ocasiun da far dumondas al cussegl grond. Il president da la citad da Cuira, Urs Marti, ha vuli udir la posiziun da la regenza areguard la scol'auta HTW.** *Urs Marti* (pld, Cuira) ha dumandà sch'il conclus da la regenza da schaner 2017, ch'i vegnia en dumonda mo Cuira sco lieu per il campus da la scol'auta per tecnologia ed economia HTW, valia anc. Dacurt era vegnì discurrì era da Landquart sco alternativa a Cuira per il campus. El ha era vuli savair sche tut ils tschintg commembers da la regenza sustegnian «cumplettamain e da maniera loiala» quest conclus. «Ed è la regenza pronta d'engaschar in manader da project che sa deditgass a la chaussa campus HTW e rapportass a la regenza in corpore?», ha agiunt il president da la citad da Cuira.

«Lieu per il campus è decis»

Cussegliev guvernativ *Martin Jäger* ha respus ch'i valia anc adina il conclus da schaner da construir il campus a Cuira. «L'uffizi da construcziun auta (UCA) è vegnì incumbensà dad analisar ils areals pussaivels en la chapitala grischuna.» Jäger ha declerà che la regenza grischuna saja in'autorità collegiala, «quai signifitga era tar questa dumonda dal campus da la HTW che tut ils commembers e la commembra da la regenza sustegnan la decisiun per Cuira.»

Areguard in eventual manader da project en chaussa ha ditg il cussegliev guvernativ che ses departament vegnia ad elavurar ina missiva en chaussa campus HTW e la suttemetter al parlament grischun. «Per la realisaziun dal project è alura respunsabel l'UCA, perquai n'è in manader da project betg necessari.» Urs Marti è stà satisfatg da las respostas dal cussegliev guvernativ, ha però anc dumandà sch'il chantun haja l'intenziun da collavurar cun la citad da Cuira. Jäger ha ditg ch'il UCA fetschia tut la planisaziun en il dialog cun ils responsabels da Cuira, «quai fa ella er en avegnir.»

Basa dal traffic resta a Tusaun

Rudolf Burkhardt (pld, Tusaun) ha dumandà sche la regenza prevesia da serrar la basa da la polizia da traffic a Tusaun e construir ina nova basa a Cuira. Cussegliev guvernativ *Christian Rathgeb* ha respus che quai na saja betg il cas, e ditg che quai valia era per l'uffizi d'inquisiziun e per la procura publica, «era quels restan a Tusaun». A la dumonda da *Patrik Degiacomi* (suppl. ps Cuira), cur ch'ils resultats da la retschertga davart la finanziaziun da la tgira d'uffants (structuras dal di) en Grischun vegnian communitgads ha ditg Jäger che quai vegnia ad esser il cas da stad 2018. La dumonda dal deputà *Beat Deplazes* (ps, Cuira) aveva da far cun querulants che pon daventar privlus: «Ils ultims diesch onns èsi adina puspè capi-

tà che 'burgais normals' han g'at-tatgas da ravgia e periclità, per part era ferì auters. Ha er il Grischun sco auters chantuns in management da quests privels che gida ad identifitgar e notar persunas che han il potenzial da daventar privlusas?» Cussegliev guvernativ *Christian Rathgeb* ha declerà che quai saja il cas, «tar nus è quai reglè da maniera decentrala, ils uffizi da la polizia chantunala collavuran stretgamain e fan quai era cun auters chantuns.»

Geniturs infurmads bain avunda?

Cornelia Märchy-Caduff (pcd, Razén) ha menziunà il Plan d'instrucziun 21 (PI 21) che vegn introduci per l'onn da scola 2018/19: «Survegnan er ils geniturs da vart dal chantun infurmaziuns areguard il PI 21, e da tgi survegnan els respostas en cas dad intschertezas?» Cussegliev guvernativ *Martin Jäger* ha declerà ch'ils geniturs vegnian infurmads da las autoritads e da las direcziuns da scola, cun il sustegn da l'uffizi da scola publica e sport. «Quel uffizi ha preparà in set d'infurmaziun per ils geniturs, d'atun vegnan las scolas preinfurmadas e da primavaira vegnan ils sets mess a disposiziun.» Jäger ha agiunt ch'ils inspecturs scolastics vegnian a sustegnair ils responsabels da las scolas. Sch'ils geniturs han dumondas pon els las far a las magistras ed als magisters, a las direcziuns ed a las autoritads da las scolas.



Il campus da la Scol'auta da tecnica ed economia HTW a Cuira vegn costruì en la chapitala grischuna.